



## **LABANK SANTRAL SESEL**

Bwat Postal 701, Viktorya, Sesel

Tel: + (248) 4 282 000; Fax: + (248) 4 226 104

Sitweb: [www.cbs.sc](http://www.cbs.sc)

---

### **KOMINIKE LAPRES**

*Viktorya – le 28 Septanm, 2018*

#### **Bord Labank Santral i mentenir en polisi moneter sere pou katriyenm kar 2018**

An linny avek son manda pou asir stabilite dan pri lo marse lokal, Bord Labank Santral in deside pou mentenir en polisi moneter sere pour katriyenm kar 2018. Sa desizyon i an linny avek previzyon ki donn lendikasyon ki logmantasyon dan to lenflasyon pe persiste pandan kour e mwayen term. Bord in pran kont ki nivo lenflasyon i pli o konpare avek lannen pase, e ki sa i ekspekte kontinyen pandan larestan lannen.

Lo marse enternasyonal, i annan logmantasyon dan pri komodite espesyalman pri karbiran, ki tre enportan pour lekonomi an term prodiksyon, transportasyon e lenerzi. I annan osi bann faktor domestik, tel ki lakantite kredi ki pe ganny pran par sekter prive, kot laplipar lón i pour konsonmasyon personnel e non pa lenvestisman. En logmantasyon dan lakantite proze lenfrastruktir ki pe ganny enplimante par gouvernman e lakonpanyen paraetatik i osi ekspekte fer monte nivo demann dan lekonomi ki evantyelman kontribye pou fer ki pri deviz i vin pli ser. Lefe revizyon e rebalansman dan tarif elektrisite, delo ek desarz, i osi en faktor ki kontribye anver logmantasyon dan nivo lenflasyon. Bord Labank Santral i osi konsernen ki polisi fiskal pour lannen 2019, i kapab anmenn plis lenflasyon e i pou re-evalye son pozisyon ler i resevwar plis lenformasyon.

Malgre ki demann i enportan pou soutenir krwasans ekonomik, demann ki an ekse i kapab okazyonn lenflasyon. I alors neser pou revwar bann polisi, pou asire ki lobzektif prensipal Labank Santral, pou asir stabilite dan pri lo marse domestik, i ganny prezerve.

Pour premye fwa deliberasyon lo polisi moneter ti fer pandan de zour (le 24/25 Septanm) e desizyon final ti ganny pran lo dezyenm zour. Prenan kont tou sa bann developman, Bord Labank Santral in

deside pou mentenir en polisi moneter sere, ki vadir retir likidite dan sistenm banker pou ki i lo en nivo ki pa okazyonn lenflasyon. Sa i annan pour bi ankouraz en lanvironnman kot sak endividi i vin pli konsansye anver son bann depans.

Sa polisi Labank Santral i ganny reflekte dan to lentere ki aplikab lo bann tranzaksyon ki Labank Santral limenn i fer avek bann lenstitisyon finansyel. To lentere ki sa bann lenstitisyon i resevwar ler zot depoz larzan ki an ekse a lafen lazournen pou reste 2.0 poursan (2.0%). Dan menm lalinny, to lentere ki sa bann lenstitisyon pou ganny sarze letan zot vin pret larzan avek Labank Santral, pou reste 8.0 poursan (8.0%).

Baze lo sa desizyon, piblik pa ekspekte vwar en bes dan to lentere ki bann labank komersyal i sarze. Sa i vadir ki lanvironnman i reste konvenab pour fer lekonomi (*savings*). A longer diton, sa sanzman dan polisi moneter i ekspekte redwir demann pou bann fasilite kredi, e osi komodite ek servis an zeneral. Sa i ava met mwens presyon lo to lesanz e fer ki lavironnman ekonomik i siport stabilite dan pri.

Labank Santral pou kontinyen obzerv developman dan lekonomi e pou reazir kan i neser pou asire ki son polisi i an linny avek son lobzektif prensipal pou asir e mentenir stabilite dan pri lo marse lokal.